

Mazarin  
2888

Le procez l'adiovrnement personel...



UNIVERSITY OF N.C. AT CHAPEL HILL



00023007185

RARE BOOK  
COLLECTION



THE LIBRARY OF THE  
UNIVERSITY OF  
NORTH CAROLINA  
AT  
CHAPEL HILL  
Mazarin  
2888



# LE PROCEZ, L'ADIOVRNEMENT PERSONEL, L'INTERROGA- TOIRE, ET L'ARREST DE MORT DV ROY D'ANGLETERRE.

*Avec le procedé dont il a esté mis à mort : Et la  
Harangue qu'il fit sur l'échaffaut.*

Selon le rapport de plusieurs Gentils-hommes Anglois  
qui y assisterent, & meirent le tout sur des tablettes.

*Fidelement traduit de l'Anglois, par le sieur DE MARSYS, Interprete  
& Maistre pour la langue Françoisse du Roy d'Angleterre regnant à  
présent, & de son Altesse Royale M<sup>se</sup> le Duc d'York son Frere.*



A P A R I S,

Chez FRANÇOIS PREVVERAY, grande  
ruë de la Bretonnerie, proche la porte  
Saint Jacques.

---

M. DC. XLIX.



## AV LECTEUR.

**M** On deuoir & les attachemens que i'ay à la Cour d'Angleterre, m'ont obligé de mettre la main à la plume pour desabuser le public, & sauuer vne seconde vie, ie veux dire la reputation au plus iuste & plus infortuné Prince qui fust iamais.

Ses ennemis pour insulter à son malheur apres sa mort, ont fait imprimer à Londres, vne Relation de son procez & de ses dernieres paroles, conforme à leurs autres actions. Et le pis est, qu'un Interprete de Roïen les a traduites en nostre langue, la prenant pour veritable.

Ce Prince auoit tous les dons naturels & acquis. Il estoit beau, grand & de bonne mine. Pour les qualitez de l'ame il estoit iuste & debonnaire, haïssoit le vice & les plaisirs des sens horsmis la musique, la chasse, la danse, la peinture & la sculpture. Il estoit sobre, chaste, pieux, accort & iouial. Il auoit le iugement bon, estoit eloquent & entendoit fort bien les Loix de son Estat, & la Religion. Il auoit toutes les qualitez d'un Gentilhomme bien esleué, & particulièrement estoit fort bon Homme de cheual. Il a donné durant la guerre Ciuile des marques de valeur & de prudence extraordinaires, qui sont deux vertus qui se rencontrent rarement en un mesme sujet. Il auoit vne inclination particuliere pour la Nation Françoisse, aymoît leurs mœurs & la politesse de leur education. Il cherissoit la Reyne sa femme plus que luy mesme, & n'estoit pas meilleur Pere de ses enfans que de ses sujets. Mais la vertu qui a causé sa ruine, est qu'il auoit horreur de la cruauté, & qu'il estoit persuadé qu'il n'estoit pas iuste de faire mourir personne pour sa Religion; Ses ennemis ont pris pied là dessus qu'il estoit Catholique, & en ayans mis l'alarme dans l'esprit des peuples, jaloux de leur Religion, ont jetté sur ce pretexte le fondement de leur rebellion.

Glorieuse cause! illustre crime! pleust à Dieu que ce Prince en fust coupable, à peine que ses ennemis fussent innocens.

Ie te donne aduis Lecteur, que ie fais distribuer vn liure qui traite des causes & premiers mouuemens de la guerre Ciuile d'Angleterre, & de la constance des Catholiques à souffrir pour la cause de Dieu & de leur Prince. Il se vend ruë Beuif chez vn Chirurgien, vis à vis la ruë Tire-chap.



LE PROCEZ, L'ADIOURNEMENT PERSONEL,

*l'Interrogatoire, & l'Arrest de mort du Roy d'Angleterre:*

*Avec le procedé dont il a esté mis à mort : Et la  
Harangue qu'il fit sur l'échaffaut.*



**P** V I S Q U E le Roy des Roys & le Seigneur de ceux qui regnent, a esté vendu, liuré & accusé deuant les Pontifes & Iuges de sa Patrie selon la chair, ne nous estonnons pas que ses Lieutenans sacrés & ses Images soient traitez de la mesme sorte. Le Vice, honteux de sa propre laideur, se farde souvent des couleurs de la Vertu, & l'injustice se sert quelque fois du bandeau de la Iustice, pour n'estre pas esblouïe de l'esclat de l'Innocence, & pour cacher la honte, que sa mauuaise conscience luy imprime sur le visage.

C'est ce qui a obligé les meurtriers du Roy d'Angleterre, d'apporter quelques formes à sa condamnation & à sa mort; mais bien loin de colorer leur crime, ils l'ont mis dans son iour, ils ont rendu leur meschanceté publique, & fait voir que la Iustice mesme estoit corrompue parmy eux.

Le premier du mois passé la Chambre des Communes assemblée, & le Roy estant à la Barre dans vne posture de Criminel, le sieur Cooke Orateur de ladite Chambre dit, qu'à la dernière seance il auoit deduit les crimes dont leur Prisonnier estoit accusé par les Communes, au nom de toute la nation Angloise: surquoy il luy fust ordonné par le President de prononcer derechef les teneurs de l'accusation. Ce qu'il fit en ces termes:

*Accusations  
contre le Roy  
d'Angleterre.*

Charles Stuart ayant esté inuesti de la Couronne d'Angleterre avec un pouuoir limité, & à condition de gouverner les peuples selon les Loix fondamentales du Royaume. Neantmoins pour paruenir à ses desseins, & se maintenir luy & ses complices dans leurs mauuaises pratiques, il a traitreusement & malicieusement leué les armes contre le Parlement & contre le Peuple, lequel y est particulièrement représenté.

En suite il fit vne deduction de toutes les places assiégées, de toutes les batailles données, & apres auoir représenté tous les sanglans effets d'une guerre Ciuile, il dit que le Roy en a esté l'Authéur pour ses interets particuliers.

Cette accusation estant finie, le President de la Chambre commanda au Roy d'y respondre, sur quoy le Roy repartit:

944.03

824231 M475m

No. 2888



Si ie ne considerois que ma vie & mon interest particulier dans cette affaire, nous en serions bien-tost sortis, & pour deliurer vos consciences d'un remords que vous donnera l'impieté sans exemple que vous exercez sur ma personne, ie m'aduoüerois facilement coupable de tous les crimes dont vous m'accusez. Je ne vous diray pas donc que Dieu par sa bonté infinie m'a placé au dessus des Loix, & que ie ne suis soubmis à aucune Iurisdiction temporelle. Mais puis qu'il y va des libertez de mon peuple, ie suis obligé pour ne pas trahir leurs interests de vous dire, que si la force peut renuerser les Loix fondamentales de l'Estat, & en establir de nouvelles, il n'y a point de sujet qui puisse estre assure de sa vie & de ses biens, mesme en bien faisant. C'est pourquoy j'espere que vous me ferez voir le fondement & les raisons qui autorisent vostre procedé.

*Le President.* Estant icy en qualité de prisonnier & de criminel, c'est vous rendre plus coupable, que de contester sur l'autorité de cette Cour Souueraine; c'est pourquoy vous devez vous resoudre directement, autrement la Cour y procedera selon les voyes qu'elle a accoustumé de tenir, en cas de silence & de recusation.

*Le Roy.* Je croy qu'il y a peu de mes sujets qui entendent mieux que moy les Loix du Royaume, & les priuileges des Parlements; ie vous demande seulement la loy & la raison que vous accorderiez à vne personne priuée, si elle estoit en ma place.

*Le President.* La Loy & la raison sont contre vous, les Arrests de la Chambre des Communes sont la loy & la raison, & il ne vous appartient pas de contester de nostre autorité. La Chambre vous en aduertit de rechef, vous n'aduancerez pas vostre affaire que de traiter le Parlement de mépris & de desobeissance.

*Le Roy.* Quoy que vostre Cour soit Souueraine, si est-ce qu'elle est subordonnée à deux autres Cours, au Tribunal de Dieu, & à celuy de vos Roys. La Loy eternelle est la regle de toutes les Loix, & la raison qui en decoule en establit de generales icy bas, que tous les hommes doiuent suivre; Et puis les Iugemens & Arrests se doiuent regler sur les Loix establies de longue main, & non pas sur celles que la passion & l'interest dictent & adiuſtent à leurs mouuemens precipitez.

*Le President.* Il n'est pas permis à vous, ny à qui que ce soit d'entamer cette matiere; c'est tout dire en un mot: Nous sommes icy assemblez au nom de tout le Royaume, & tous vos predecesseurs ont tousiours esté responsables de leurs actions à cette Souueraine autorité.

*Le Roy.* Je n'en sçache aucun exemple: & que vous soyiez assemblez au nom & du consentement de tout le Royaume, ie le nie absolument, & en prends tous mes sujets à témoin; & puis que c'est d'eux que vous tirez le fondement de vostre autorité, ie ne vous demande point d'autres Iuges que mes peuples, pour examiner mes actions.

*Le President.* Vous ne devez pas interrompre la Chambre quand elle vous

RBC/MCU



vous parle, le Parlement est assemblé, & a l'autorité de vous iuger & de vous condamner.

*Le Roy.* Combien y en a-t'il d'entre vous du nombre de ceux qui ont esté élus par le peuple ? où sont les Pairs du Royaume, le Clergé & vos Princes qui doiuent presider dans la Chambre haute ? est-ce le lieu qui vous fait membre du Parlement, & qui vous confere l'autorité ? & puis les Communes furent-elles iamais vne Chambre de Iudicature ?

*Le President.* L'on ne vous permet pas de continuer ce discours.  
*Lors l'Orateur de la Chambre lent ce qui s'ensuit.*

Charles Stwart Roy d'Angleterre, vous estes accusé au nom de la Nation Angloise de haute trahison, & d'autres grands crimes, ausquels la Chambre ordonne que vous respondiez.

*Le Roy.* I'y respondray aussi tost que ie sçauray, d'où elle a le pouuoir de me l'ordonner.

*Le President.* Est-ce là tout ce que vous auez à dire. Qu'en jugez vous Messieurs ? Huissiers, remenez vostre prisonnier.

*Le Roy.* Je demande à donner mes raisons par écrit, & quelque temps pour y traualier.

*Le President.* Ce n'est pas l'ordre de cette Cour.

*Le Roy.* On peut bien faire quelque grace à vn criminel de ma sorte.

*Le President.* Quand on vous ramenera vous entendrez plus ample-ment le bon plaisir de la Cour, & peut estre sa resolution finale.

*Le Roy.* Quoy il ne serap as permis à vn Roy de deduire ses raisons, touchant la liberté & franchise de ses subjets ?

*Le President.* Huissiers encore vn coup, remenez vostre prisonnier.

*Le Roy fut conduit au logis du Chenalier Robert Cotton, & la decision de l'affaire remise au lendemain.*

Le Mardy deuxieme Fevrier, les Iuges qui estoient aussi les parties de ce Prince innocent, s'assemblerent au nombre de septante-trois, pour autoriser leur parricide ; & l'on a remarqué que le Roy entrant dans la Chambre accompagné de satellites, enuifagea toute l'assemblée d'un œil feure & plein de Majesté.

Le sieur Cooke, Orateur general remonstra à la Cour, que le iour precedent, le prisonnier, au lieu de respondre aux accusations à luy imposées, auoit mesprisé l'autorité de la Cour, & qu'on le pouuoit condamner par contumace, comme on auoit fait plusieurs autres personnes qui l'auoient moins merité que luy.

*Le President prenant la parole dit :* Charles Stwart, vos subterges & vos elusions offensent extremément la Cour, vos delays nous sont importuns & nuisibles, c'est pourquoy respondes aux accusations dont on vous charge, sans contester de nostre autorité, autrement nous vous priuerons de la liberté, que nous vous auons accordée de vous iustifier si vous pouuez, & pronocerons l'Arrest de mort sur le rapport des tesmoins.



*Le Roy persista tousiours à leur demander des preuues & des fondemens de leur autorité, en des termes presque semblables à ceux du iour precedent, & alors le President dit:*

*Le President.* Voicy la troisiéme fois que vous auez desobey à la Cour, en ne vous iustificiant que par mépris & par arrogance. *Et puis se tournant vers l'Orateur il dit,* Monsieur l'Orateur faites vostre charge.

*Et l'Orateur presenta vn papier au Roy, luy commandant pour la dernière fois de respondre à ses accusations. Et le Roy l'ayant leu, dit:*

*Le Roy.* Je vous dis encore vne fois, que ce n'est pas la crainte de la mort qui m'oblige à contester avec vous de vostre autorité; Je vois bien que toutes ces formalitez ne sont que des grimaces pour eluder mes sujets; & que pour establir authentiquement vostre nouuelle & illegitime autorité, vous en voulez faire l'essay, & en jeter le fondement sur ma Personne, esperant qu'on ne disputera point à se ranger sous des Loix, que le Legislatteur luy mesme aura signez de son sang, de mesme qu'il n'y a point de plus grand tesmoignage de la verité de la Loy Chrestienne, (si j'ose vser de cette comparaison) que la Mort de I E S V S - C H R I S T, qui la seelée de son propre Sang: Mais si vostre interest tyrannique vous oblige d'éluder le peuple, ie suis obligé par la qualité de Pere & de Gouverneur de le desabuser, & de maintenir ses libertés & ses priuileges: *Alors le Roy fut interrompu par le President, qui dit:*

*Le President.* Vrayement vous auez bien maintenu les libertez & les priuileges du peuple.

*Le Roy.* I'en atteste Dieu & tous mes Peuples à tesmoins; & vous mesme n'estes pas ignorans, que c'est pour auoir contrecarré vostre tyrannie, & n'auoir pas voulu l'autoriser de mon consentement, que ie suis l'objet de vostre indignation & de vostre rage. Mais pour reprendre mon discours.

Je vous disois que ce n'estoit pas la crainte de la mort qui m'obligeoit à contester de vostre autorité, mais bien l'interest de mes Peuples, ne pouuant en conscience consentir à la ruïne des Loix fondamentales, qui les ont gouuernez des siecles entiers si heureusement, & sans lesquelles vous mesmes & vostre posterité ne sçauriez viure sans des dangers & des craintes continuelles, puisque la force establit des Religions & des Loix, auxquelles vn chacun se doit soumettre sans appel. *Et le Roy dit en suite plusieurs choses qu'il auoit dit le iour precedent, & fit voir que le Parlement n'estoit pas conuqué legitimement, & qu'il estoit imparfait, la Noblesse & le Clergé en estant bannie, & n'y ayant presque pas vn des membres qui y auoient pris seance par election:* Alors le President prenant la parole dit.

*Le President.* Vous ne cesserez point de charger de calomnies & de mépris le Parlement. Mais vous apprendrez par les effets que cette Cour est vne Cour de Iustice, vostre recusation & vostre silence nous sert d'adueu. Il est vray que vos actions parlent d'elles-mesme, & que



vous les auez escrites en caracteres de sang par tout le Royaume.

*Le Roy.* Vous m'obligez à me iustifier malgré moy, mais ie ne le fais pas en qualité de criminel, ny comme deuant mes Iuges, mais deuant des imposteurs & des Tyrans du peuple, qui veulent authoriser leurs crimes & establir leur iustification sur les ruïnes de mon innocence. Vous sçauiez mieux que moy, qu'apres m'estre despoüillé entre vos mains de mes plus belles prerogatiues, & vous auoir accordé iusques au delà de ce que vous me demandiez, vous me poussastes hors de Londres, disant, que mes condescendances estoient trop grandes pour n'estre pas suspectes; Vous sçauiez que vous auez leué les armes les premiers, pour ne pas dire que vous auez attiré celles des Escossois dans ce Royaume, crime capital contre l'Estat, d'y introduire des troupes estrangeres. Vous sçauiez que i'ay proposé cent fois la paix que vous auez tousiours eludée, que me pouuant aduantage de mes alliances parmy les Princes estrangers, & receuoir le secours qu'ils m'offroient, ie n'ay pas voulu blesser cette Loy fondamentale, quoy que vous m'en eussiez donné l'exemple, & ay mieux aimé peirir que de choquer vne Loy, & exposer mes peuples aux brigandages des Nations estrangeres, comme vous auez fait. Apres cela, qui est coupable du sang respandu de vous ou de moy?

*Le President.* Vous ne deuiez iamais prendre les armes contre le Parlement, & vous lousmettre plustost à ses volontez.

*Le Roy.* Il eust donc fallu que j'eusse trahi la cause de tout l'Estat que vous attaquiez, ma propre dignité que vous esbranliez, & la Religion que vous renuersiez de fonds en comble.

*Le President.* Il suffit que l'on vous ait veu l'espée à la main à la teste de nos ennemis; & que vous ayez arboré vostre Estendart, pour estre digne de mort.

*Le Roy.* Et vous, il suffit que vous soyiez inspirez de l'Enfer, pour proceder de la sorte enuers vostre Roy.

*C'est un signe de l'arriereban, nous appellions cela autr fois en France l'Oriflambe.*

Lors le Roy se retira accompagné de ses satallites ordinaires, chez le Cheualier Robert Cotton, & l'affaire fut remise au Ieudy suiuant.

Le Ieudy quatriesme Feurier, les Commissaires du Parlement assembles pour le procez, c'est à dire ceux qui auoient la conscience la plus large, & les cœurs les plus impies & les plus inhumains, oyrent les tesmoins qui deposèrent tous ses crimes dont ils chargeoient cét infortuné Prince, qui n'estoient autre chose qu'un recit succinct de ses Victoires ou de ses deffaites, & qui ne tenoit ensin qu'à prouuer qu'il auoit fait la guerre. L'un soustenoit qu'il auoit veu le Roy à la teste des troupes, & l'espée à la main à Beuerley, dans le Comté d'York, l'autre qu'il auoit esté present à Nottingham, lors qu'il y fit arborer son Estendart, l'autre à Edghill, l'autre dans la plaine de Keimron, l'autre à Brainchford, l'autre au pont de Cauesham, l'autre au siege de Gloucester, l'autre à la bataille de Neubery, l'autre en la plaine de Naseby, & ensin plusieurs autres nommerent plusieurs autres places, où ils disoient auoir



veu le Roy exercer les fonctions d'un soldat & d'un Capitaine. Tellement que les mesmes actions qui ont donné des Couronnes & des triomphes à des Césars, & à des Alexandres, pour auoir despoüillé toute la terre, donnent la mort & des pompes funebres à un Roy qui veut maintenir son autorité, la liberté de ses peuples, & la Religion de ses Predecesseurs. Barbares plus desnaturez que les Barbares mesme, encore lisons nous que la vertu a trouué quelque recompense parmi eux, & qu'ils l'ont estimée mesme dans la personne de leurs ennemis. N'estoit-ce pas assez que vous fussiez victorieux, sans insulter par vos accusations iniustes & ridicules, au malheur de vostre Prince? vous possediez tout, & sa vie qui estoit entre vos mains, vous estoit un thresor le plus cher que vous possedassiez, & vous seruoit de gage pour tout le reste. Mais Dieu a voulu oster ce Iuste de parmi vous, parce que ses prieres arrestoient le bras de sa Iustice, & a permis que vous attirassiez sur vos testes criminelles par la mort de ce Prince, la vengeance des autres Monarques, qu'une longue & honteuse prison ne pouuoit ammer.

Le Vendredy le Roy ne fut pas au Parlement, lequel employa ce iour à resoudre ce qu'ils executeroient le iour suiuant, & le Roy à se consoler avec Dieu seul, & luy faire vn sacrifice de sa vie & de sa Couronne.

Le Samedy sixième de Fevrier, la Chambre estant assemblée, où le President estoit en robe rouge, le Roy fust conduit deuant eux par ses satelites ordinaires, & comme il passoit par la grande Salle de Wesminster, les plus infames d'entre le peuple, criant comme les Iuifs deuant le Confistoire de Pilate, *Iustice, Iustice, execution*. Le Roy estant entré dans la Chambre, dit qu'il auoit des choses de grande importance à declarer, & qu'il luy fust permis d'estre ouïy deuant les Seigneurs & les Communes. Surquoy la Cour fit retirer le Roy pour mettre la chose en deliberation, & il fust resolu qu'il ne seroit pas ouïy, parce disoient-ils, qu'il ne demandoit cela que pour prolonger l'affaire, & qu'on ne scauoit pas ce qui se pouuoit brasser cependant.

Demy-heure apres le Roy fust ramené, & le President ayant fait vne longue deduction de toutes les marques d'un mauuais gouuernement, dit que le Roy en estoit coupable, & rapporta plusieurs exemples des Roys qui auoient esté mal traité de leurs sujets, & entr'autres celuy de cette innocente & sainte Princeesse Marie Stewart ayeule du Roy, que la politique impie d'une autre Iesabel sacrifia à sa jalousie & à son ambition.

Ce long Panegyrique des meurtres execrables de Reynes & de Roys estant acheué, le President commanda à l'Orateur de lire encore vne fois la liste de tous les crimes dont le Roy estoit accusé, ensuite dequoy il prononça l'Arrest de mort en ces termes.

*Charles Stewart cy-deuant Roy d'Angleterre, comme Tyran, traistre, meurtrier, & ennemy public, sera mis à mort par la separation de la teste de son corps.*

Ces barbares mesme furent estonnez de la constance avec laquelle ce Prince



Prince receut cét Arrest de condemnation, auquel il ne respondit que par vn vif effacement des yeux vers le Ciel, comme s'il l'eust voulu coniurer de pardonner cette impieté à leur aueuglement. Ainsi les Iuifs accuserent Nostre Sauueur, d'estre perturbateur du repos public, Magicien & faux Prophete, & ainsi fust-il liuré par Herode & les autres Pontifes, à la rage des peuples & aux glaives des bourreaux.

Dieu vengeur des crimes, si vous n'auiez point souffert la mort de vostre propre Fils, ie m'estonnerois que vous ne lanciez pas vn coup de foudre au milieu de cette assemblée criminelle pour l'escraser. Mais si vous auez determiné qu'un iuste perisse pour les pechez de tout vn peuple, & que la mort d'un Roy innocent expie le crime d'un Roy criminel, qui a attiré vostre colere sur l'Angleterre, en y jettant les fondemens de l'Heretie, & prophanant le Sanctuaire sacré, pour assouuir sa lubricité demesurée; Souffrez mon Dieu, que la chasteté, qui a reluy dans ce bon Prince avec toutes les autres vertus efface la noirceur de cette lubricité criminelle, & que l'innocence de sa mort appaise l'indignation que vous auez conceüe contre le procedé impie de ce predecesseur; Mais Seigneur, accordez aux prieres d'une Marie Stuart, qui porte au milieu de vos vaillantes saintes la couronne du Martyre, vn rayon de cette lumiere penetrante, pour desillir les yeux de ce Prince, dans ce passage important; accordez-luy, comme à vn autre saint Estienne, que les nuës se fendent, & qu'il voye cette grande Reyne aux pieds de Iesus-Christ, le Chef & Prototype des Martyrs; qu'il entende les Anges & les Cherubins tous bruslans de cette Charité genereuse, entonner melodieusement le saint Nom de Stuart, & qu'il le voye couronné de gloire dans le sexe le plus infirme. Si vous terrassez ce Prince du Throïne & de la plus belle vigueur de son aage, que ce soit d'un coup de lumiere comme vn autre saint Paul, & ne permettez pas qu'une de vos images viuantes, dont la mort a tant de circonstances, retirantes a celles de la mort de Iesus-Christ, mesme dans les tenebres de l'heresie.

*Henry VIII.  
Roy d'Angleterre  
re Auteur du  
Schisme.*

Le Roy ayant employé quelques moments à faire des actes de resignation à la volonté diuine, sur la rigueur inouïe de cét Arrest, demanda à estre oïy, mais parce que la Sentence estoit prononcée on ne luy voulut pas accorder. Il fust remené chez le Cheualier Cotton, & de là à son Palais de Withehall, & passant par la salle de Westminster, le peuple cria encore une fois, Crucifiez, crucifiez.

En suite la Chambre passa vne Declaration pour changer la forme des escritures, & autres procedures du Politique & du Ciuil, & mesme celles des prieres ordinaires de l'Eglise, où ils firent faire deffente de prier pour le Roy, & firent publier qu'on ne fit rien d'oresnauant en son nom.

Considerant aussi, qu'apres la mort du Roy, l'on pourroit proclamer Roy le Prince de Galles, ou quelqu'un des autres Princes, elle fit dressez



vn ordre, par lequel il estoit deffendu de reconnoistre vn Roy, sur peine d'encourir le crime de haute trahison, comme aussi de prescher ou dire quoy que ce soit contre leur procedé.

Le Roy demanda au Parlement par vn des Officiers de l'armée qu'il luy fust permis de voir ses deux enfans, le Duc de *Glocester* & la Princesse Elizabeth, qui sont prisonniers de ces barbares, & qu'ils sacrifieront peut-estre encore à leur fureur, si les Princes Chrestiens ne leur arrachent bien-tost des mains; comme aussi qu'il pût conferer particulièrement avec le sieur *Luxson* Euesque de Londres, pour le soulagement de son ame, ce qui luy fust accordé. Le Dimanche, ledit Euesque prescha deuant sa Ma<sup>esté</sup>, où il despouilla la mort de toutes ses espines & de toutes ses amertumes.

Et le Roy eust le Dimanche & le Lundy pour s'apriuoiser avec la mort, & rompre tous les liens de la terre & de l'amour paternel, pour voler plus legerement au Ciel. Nous ne pouuons sçauoir que de la bonté de ce Prince & de cette Princesse, les consolations que le Roy & Pere leur donnoit, & comme il les exhortoit de ne jamais rien faire d'indigne de leur naissance, & de mourir plustost que d'abandonner son peuple à la tyrannie des vsurpateurs de sa Couronne; Mais pourtant il les prioit & leur faisoit promettre de ne point tirer vengeance de sa mort, leur disant que Dieu en disposeroit selon les decrets de sa Prouidence, & que le bien qu'ils feroient à ses peuples les reestabliant dans leurs droits & libertez, luy feroit vne tres-ample satisfaction. En suite il détacha sa jartiere bleuë, qui est vne marque de l'Ordre, qui porte ce nom, & la lia à la jambe de son fils, le petit Duc de Glocester.

J'ay horreur de vous rapporter les indignitez que les satellites insolens commettoient en la presence de ce Prince, & comme s'ils eussent eu peur qu'il se fust eschappé imperceptiblement des prisons, comme le Prince des Apostres, ils couchoient dans sa chambre, & s'enyuroient & crioient de sorte qu'il luy estoit impossible de reposer, & comme il auoit vne auersion extreme pour le tabac, & qu'il les prioit de n'en point prendre, ces infames luy respondoient, qu'ils n'estoient pas là pour luy obeir, & pour luy donner ses plaisirs; ils tiroient les rideaux de son lit; ils luy crachoient au visage; ils le descouuroient; bref imaginez-vous vne troupe de demons dans la cellule de saint Antoine. Ainsi ce Prince passa toute la nuit, entre les mains de la plus sordide & la plus enragée canaille que l'enfer ait jamais vomy.

Le Mardy neuuème de Ianuier, le Roy fut conduit de saint Iames, maison Royale où demeurent d'ordinaire les ieunes Princes, à trauers le Parc qui vient gagner Whitehall, lequel estoit tout plein d'Infanterie en bataille. L'Euesque de Londres estoit aupres de luy, & le Colonel Thomlinton Capitaine de sa garde, qui parloit à sa Majesté la teste nuë, il estoit aussi accompagné de quelques Gentilhommes de sa maison, qui estoient



venus là pour recevoir ses dernières commandements, il passa par la Galerie de Withhall pour aller à la chambre, où il avoit coustume de coucher du temps de sa splendeur; on luy demanda s'il ne vouloit pas disner, il respondit que non; parce dit-il, qu'il avoit receu la Communion vne heure auparavant, & que cét antidote suffisoit pour repousser tout le venim de la mort, qu'il avoit Dieu mercy le cœur fort bon. Ayant employé le temps du disner à prier Dieu dans le Cabinet où il faisoit de tout temps ses prières, il passa avec sa garde ordinaire, & la Compagnie d'aparaavant à travers la Cour de Withhall, qui estoit encore toute couverte d'Infanterie. Ce Prince, dont la constance triomphoit de tant d'ennemis, triomphoit encore de la mort même, qui ne pouvoit effacer de son visage sacré l'image vivante de Dieu pour y marquer la sienne; il marchoit la teste leuée avec vne Majesté pareille, que s'il eut esté dans quelque ceremonie importante. Il estoit vestu d'un satin noir & d'une robe de chambre de même estoffe, & portoit le cordon bleu & l'Ordre de saint Georges, autrement dit de la lartiere, l'eschaffaut estoit tendu de noir, & il y avoit quatre anneaux de fer aux quatre coins, vne hache d'un costé & un billot de bois de l'autre. Le Prince y monta comme assez resolutement, & ne donna iamais aucune marque de douleur ou de despit, il parut d'abord deux bourreaux masquez, qu'on croit estre *Fairfax & Cromwell*, parce qu'ils ne parurent point de tout le iour, soit qu'ils se desfassent de toute autre personne, ou qu'ils voulussent eux mêmes goûster ce detestable plaisir, de tremper leurs mains sacrileges dans le sang Royal. Car vous sçavez que les bourreaux ordinaires, quoy qu'accoustumez au carnage, eurent horreur de prester leurs mains à cet horrible parricide, & s'enfuirent ou se cachèrent. Toute l'armée *Fairfaxienne* estoit sous les armes, & les eschaffauts d'alentour chargez de peuple, à qui l'on faisoit accroire que leur Roy n'en auroit que la peur, & qu'il falloit user de ces formalités pour satisfaire à la Justice. Le Roy iettant l'œil sur le billot, demanda au Colonel Haker s'il n'estoit pas possible d'en avoir un plus haut. Vous sçavez qu'en Angleterre on se sert d'une hache pour couper la teste, en reposant le col sur un billot de bois. En apres le Roy parla en ces termes, adressant particulièrement son discours au Colonel Thomlinson.

---

### H A R A N G U E D U R O Y D' A N G L E T E R R E sur l'eschaffaut.

**I**E me tairois, si ie ne craignois que mon silence ne fut réputé pour un adveu des crimes, dont j'ay esté perfidement accusé; Premièrement j'appelle Dieu à témoin, devant le Tribunal duquel ie dois bien-tost comparoistre, si j'ay iamais eu la pensée seulement de fouler mes peuples,



& diminuer les priuileges du Parlement ; Toutes les condescendances que ie fis à leur ouuerture en font foy , qui allerent iusques à me dépouiller moy mesme de certaines prerogatiues qu'on n'auoit iamais disputé à mes predecesseurs ; comme d'accorder qu'il s'assembleroit vn Parlement de trois ans en trois ans , qui ne se pourroit rompre sans le consentement des deux Chambres. Ie ne parleray point de la vie de mon premier Ministre que ie soumis à leur examen , & que ie sacrifiai , pour ainsi dire , à leur rage & à leur ambition.

Vous estes tous tesmoins si ie commençay à leuer les armes , s'ils ne se saisirent pas les premiers des Arsenaux & des fortes Places , & si l'on considere les dattes de leurs Commissions & Declarations , l'on verra que c'est eux , & non pas moy , qui a commencé la guerre.

Ie leur pardonne pourtant volontiers ma mort , & souhaite que mon sang serue à vne paix & tranquillité parfaite dans ce Royaume. Si ie suis innocent enuers les hommes , ie ne le suis pas enuers Dieu , que i'ay offensé par mes pechez , & par mes negligences à le bien seruir & adorer.

Ie prie Dieu que mon sang soit efficace pour vostre pardon , & qu'il appaise les fieux dont le Ciel menace l'Anglererre. Mais permettez que sur ce sujet ie vous donne vn conseil , dont vous pourriez bien trouuer.

Il est impossible d'asseurer des conquestes sans la Religion & l'amour des subiects , le libertinage de la guerre a effacé l'une , & ses violences vous ont rauy l'autre. Faites maintenant respirer les peuples par vne bonne paix ; ce que vous ne pouuez faire assurément sans restablir mon fils , pour qui tous les Princes Chrestiens se declareront infailliblement. Courez au deuant de la vengeance dont ils vous menacent , & pour ne pas tout hazarder , relâchez vne partie de vostre bonne fortune à mon successeur & à vostre Roy.

Et parce que Dieu recompense souuent les vertus Morales par les Chrestiennes , & les bonnes actions temporelles par des dons surnaturels , quand il verra que vous ferez cas de son Image , & de son Lieutenant , sans doute qu'il se manifestera à vous , & vous inspirera les Loix que vous deuez tenir , & les lumieres necessaires pour establir vne Religion conforme à sa parole.

Pour les Loix vous n'auiez qu'à suiure les anciennes , qui sont propres aux hommes de cette nation , & font vn tres beau temperament contre l'insolence des peuples & le pouuoir Souuerain de la Monarchie. Ayant fini ce discours il se tourna vers les bourreaux & leur dit :

*Tenez traistres & rebelles , assouuissiez-vous de mon sang.*

N'auiez vous iamais oüy les termes de transport , que saint André fit à la veüe de la Croix où il alloit estre attaché ; il semble que ce Prince estoit pareillement



pareillement amoureux des instrumens de son peuple. Vn Gentilhomme d'entre les spectateurs maniant la hache, il le pria de ne la point gaster; & voyant que plusieurs escrivoient tout ce qu'il disoit, il leur dit, Messieurs, ie suis marry que ie n'ay pas pris la peine de digerer mieux mon discours; ce sont les sentimens du cœur sans déguisements & sans fard, tels qu'ils seront bien-tost estalez deuant la Iustice diuine, où l'innocence n'a point besoin d'eloquence ny de sermens pour se iustifier.

En suite le Roy dit au Colonel Haker, ayez soin s'il vous plaist qu'on ne me fasse point languir, puis il osta le collier de l'Ordre qu'il remit entre les mains de l'Euesque de Londres, & vne bague qu'il auoit au doigt, qu'on tient qu'il commanda d'estre enuoyée au Prince de Galles. En suite il despouilla son pourpoint, & remit sa robe de chambre par dessus sa camisole, & tira vne coëffe de sa pochette, tant il s'estoit apprinoisé avec la mort, & retroussa ses cheveux dessous. On le voulut attacher aux quatre anneaux; mais il dit qu'il n'estoit pas besoin, & qu'il mourroit sans repugnance; puis apres auoir fait ses prieres & parlé quelque temps à l'Euesque de Londres, il s'agenouilla & mit le col sur le billot, en disant au bourreau, ie voudrois qu'il fust vn peu plus haut, mais il n'importe, il faut qu'il serue; donnez le coup lors que i'estendray les bras, ce qu'il fit incontinent apres, & la hache separa cette Royale teste de son corps, pour la couronner sans doute, d'une couronne qui n'est point sujette aux caprices de la fortune; Aussi-tost les bourreaux disparurent, & les soldats jettant vn cry de ioye & de triomphe mirent l'espee à la main, & le lasche peuple de Londres qui a tant persecuté la belle vie de ce Prince, donne des larmes & des regrets inutiles à son espouventable mort.

L'un des soldats monta sur l'eschaffaut, & mettant la teste du Roy au bout de sa pertuisane, la monstra aux spectateurs, en proferant des blasphemies, & son corps fust mis dans vne bierre couuerte de velours noir, où il repose à present dans sa chambre à Withehall.

N'estes-vous pas satisfait Dieu de Iustice, mais de misericorde, de cette victime? n'est-elle pas assez noble & assez pure, pour appaiser vn courroux qui a duré depuis vn siècle? la satisfaction est proportionnée au crime, & à la conformiré que requiert ordinairement vostre Iustice; & apres que l'homme eust peché dans l'estat d'innocence, vous le rachetastes au plus fort de ses iniquitez; & parce que c'estoit l'homme qui vous auoit offensé, il fallut, que ce fut vn Dieu-Homme qui vous satisfist. Dedans la splendeur & pureté de l'Eglise en Angleterre ses peuples tóberent dans le schisme par l'apostasie d'un Roy, & dans le fort de l'infolence & de la fureur de l'heresi, vn Roy meurt pour vous satisfaire. Mais c'est vn Iuste qui meurt, & d'une mort qui est à peu pres la copie de celle de Nostre Sauueur Iesus-Christ qui fut liuré par l'un de ses Apostres; ce Prince-cy l'a esté par ses sujets compatriotes. Iesus-Christ fust vendu pour

*Il y a enuiron cent ans que le schisme commença en Angleterre.*



vne somme d'argent, aussi a esté ce Prince; Iesus-Christ fust mené deuant les Iuges de sa Patrie & accusé de crimes supposez; ce Prince a esté traité de la mesme sorte; Iesus-Christ fut insolemment traité des satellites, il fust moqué, baffoué, & enfin mourut par la main des bourreaux; ce Prince a souffert les mesmes ignominies, comme vós pouuez voir dans la Relation cy-dessus. Mais le rapport aduantageux que ie trouue de cette mort avec celle de Iesus-Christ, est que Nostre Sauueur contracta vn mariage eternal avec son Eglise, & que le Roy d'Angleterre a espousé vne fille de l'Eglise, vne Princeesse, fille, sœur, & tante des Fils aînés de l'Eglise, qui ne cesse point d'animer le Ciel par ses prieres, & la terre par son infortune, & qui obligera enfin l'un & l'autre, à chastier les demons de l'Angleterre, pour y restablir la Croix.

Mais j'entends des-jà vn doux murmure qui frappe nos oreilles: l'ame de ce Prince ne fut pas si-tost dans le Ciel, qu'elle obligea la belle Astrée de descendre icy bas: elle part le glaive à la main & la balance de l'autre, & d'un vol iuste & compassé, estend ses plumes blanches & dorées sur la Metropole de l'Vniuers; La paix marche sur ses postes, & vient planter vn Oliuier incorruptible dans le Palais de cette Deesse. Les Princes Chrestiens quittent & partent de tous costez pour luy rendre hommage, & protestent qu'elle sera désormais la regle & le fondement de leurs actions. C'est dans cette grande ville de Paris, le centre de l'Europe Chrestienne, & le Theatre des grands projets, que se doit former vne autre Croisade pour exterminer ces meurtriers de Reynes & de Roys. Les Villes sont des conquestes trop chetiues pour des Princes si belliqueux; leur valeur doit auoir pour matiere des Isles & des Royaumes entiers; & pour but & couronnement vn Royaume eternal. C'est dans cette Isle barbare qu'ils feront leur coup d'essay pour venger l'Eglise de Dieu, & puis ay: Et estouffé les monstres domestiques, ils pousseront iusques dans la Palestine leur sainte valeur, pour estouffer d'autres barbares qui prophaneient les lieux que la presence de Nostre Sauueur a rendu sacrez; Et nous verrons nostre ieune Roy, digne successeur de Saint Louis, arborer la Croix sur les armes des Idoles de Mahomet, & les Lys que sa valeur antera au pied del' Arbre de la Croix, rendront vne odeur si suaué par toute la terre, que la qualité de Chrestien fera par toute la terre la definition del'homme.















